

26/02/2000

Dokumentasi sejarah Sintok di UUM

ORANG ramai yang berminat dengan sejarah tempatan dijemput menghadiri majlis Pengkisahan Sejarah bertajuk `Darurat Di Sintok, Kedah' bertempat di Pusat Konvensyen Universiti Utara Malaysia (UUM) pada 26 Februari ini.

Ketua Penolong Pendaftar (Perhubungan Awam) UUM, Mohd Zaini Nasri, berkata majlis itu bertujuan mendokumentasikan sejarah latar belakang Sintok yang pada suatu masa dahulu pernah menjadi sasaran kegiatan penganas komunis.

Katanya, majlis yang dianjurkan bersama Arkib Negara Malaysia cawangan Kedah/Perlis dan UUM ini akan dirasmikan oleh Menteri Besar Kedah, Datuk Seri Syed Razak Syed Zain.

"Majlis ini akan dijayakan oleh tiga tokoh lama yang terbabit secara langsung dan tidak langsung dengan sejarah Sintok dan mengetahui banyak maklumat mengenai kegiatan penganas komunis di hutan Sintok pada masa lalu.

"Mereka terdiri daripada bekas Pegawai Agama Rejimen Ke-5 Askar Melayu Diraja, Syed Shahil Syed Muhamad, Ahmad Ariffin yang terkenal sebagai pemuisi Affrini Adham, dan Som Awang yang pernah menjadi anggota polis dan bertugas di Balai Polis Sintok sekitar tahun 1950-an," katanya.

Sebelum terbinanya kampus UUM di Sintok, kawasan Hutan Simpan Sintok seluas 4,000 hektar ini adalah kawasan yang diwartakan sebagai kawasan hitam akibat keganasan penganas komunis oleh Parti Komunis Malaya (PKM) yang bergerak di Selatan Thailand.

Apabila PKM meletak senjata dan menamatkan perjuangan mereka, kawasan Sintok telah diwartakan sebagai kawasan putih semula pada Disember 1988 oleh Perdana Menteri, Datuk Seri Dr Mahathir Mohamad, selaku Menteri Dalam Negeri. Tindakan itu membolehkan UUM memulakan pembinaan Kampus Sintok pada 7 Januari 1989.

UUM memulakan operasinya di kampus Sintok pada 15 September 1990 apabila pelajar baru sesi 1990/1991 mendaftar dan disusuli dengan kemasukan pelajar senior seminggu kemudian untuk memulakan pengajian.

Sebelum itu, UUM beroperasi di kampus sementara di Bandar Darul Aman, Jitra, Kedah selama enam tahun.

Menurut Mohd Zaini, kini jumlah pelajar UUM telah meningkat kepada 16,500 orang dengan seramai 14,500 orang bermastautin di kampus Sintok manakala sebahagian yang lainnya adalah pelajar Pendidikan Jarak Jauh (PJJ), pelajar francais selain kampus Transit Kuantan dan kampus Sungai Petani.

(END)